

# LA QUOTIDIANA

FMR Fundaziun Medias Rumantschas, Via da Masans 2, 7000 Cuiru, 081 544 89 11, redacziun@fmr.ch



## Ina gronda maisa per celebrar il cult divin

La baselgia da Favugn è vegnida renovada. Empè da bancs ha ella ha uss ina gronda maisa amez la nav. [Pagina 3](#)



## Premis per il grond engaschament benevol

L'organisaziun Benevol Grischun ha undrà questa sonda engaschaments grischuns en la lavur voluntara. [Pagina 3](#)

FMR FUNDAZIUN  
MEDIAS  
RUMANTSCHAS

südostschweiz

## ENGIADINA

### Tschierv as prepara per il Tour de Ski – suot novas circumstanzas

Daspö l'on 2013 organischa la Val Müstair etappas da la seria da cuorsas da passlung nomnada Tour de Ski. Quist on fa quai il comitè d'organisaziun sainza il sustegn finanziel da cumün e regiun. Pella paja sustegnan sponsurs e donaturs finanzielmaing plü ferm las duos cuorsas a Silvester 2022 ed a Büman 2023. Sco cha'l president dal comitè d'organisaziun *Guido Mittner* disch ha il comitè cumanzà fingià in october cullas lavuors d'organisaziun: «Uossa faina naiv ed al principi da quist'eivna cumanzaina a fabricar a Tschier l'infrastructura chi douvra per la partenza resp. il böt da las cuorsas.» (fmr/fa) [Pagina 9](#)

## SURSELVA

### Fusiun da duas musicas giuvenilas



Serafin Cadruvi (sen.) e Remo Derungs ein motivai. FOTO AUGUSTIN BEELE

Il settember vargau han bunamein 40 musicantas e musicants giuvenils dall'entira Surselva entschiet ad exercitar per in concert. Entochen lu sunavan els en duas differentas musicas giuvenilas. Ils 29 d'october han la radunonza generala dalla Musica giuvenila Lumnezia e quella dalla Musica giuvenila Foppa decidiu da fusiunar. Che fusiunar dat forza e rinforza ein commembras e commember perschuidi. Emprem dirigent dalla nova Musica giuvenila Surselva ei *Remo Derungs*. El ha dirigiu ils davos onns la Musica giuvenila Lumnezia. Quella dumbrava il davos 22 musicantas e musicants. Tier la Musica giuvenila Foppa era il diember sereducius sin 19 e pil dirigent *Serafin Cadruvi* era la situaziun buca cuntanteivla. Grazia alla restructuraziun ed il rinforz communabel han musicantas e musicants giuvenils ussa novas perspectivas. La formaziun da brass seprenta lu era alla publicitad cun in empren concert. Ils 11 da december a Sagogn ed ils 17 da december a Vignogn vegn la Musica giuvenila Surselva a presentar siu potenzial. (fmr/abc) [Pagina 5](#)

## GRISCHUN CENTRAL

### Il davos rorate sin il Gelgia

Onn per onn pelegrescha adina ina gronda fulla da glied durant l'advent – la damaun fitg a marvegl – cun autos da posta en fin sin il Pass dal Gelgia. En la tur cotschna sisum il pass envida il Festival cultural Origen a concerts da rorate. Quest onn è il chant gregorian vegn intunà durant las emprimas quatter damauns dal december dad in quintet da dunnas da l'ensemble hollandais «Wishful Singing». Il rorate è però resunà quest onn per la davosa giada en la fradaglia matutina dal Gelgia. La proxima stad vegn la tur cotschna demontada, suenter esser stada en funcziun durant sis onns (2017–2023). (fmr/dat) [Pagina 11](#)

## La mancanza sa fa valair – era tar ils medis da chasa

Las cifras èn evidentas: ils proxims onns vegnan a mancar en il Grischun medis da chasa. L'Uniun grischuna da medias e medis vul perquai render pli attractiva la professiun, gist er ora en las valladas. E l'uniun propagescha models da cooperaziun.

MARTIN GABRIEL/FMR

Las medias ed ils medis da chasa en il Grischun daventan adina pli rars. Quai è in fatg ch'è da declerar cun pliras raschuns. L'emprim motiv per la mancanza da medis da chasa è tenor *Marc Tomaschett* da l'Uniun grischuna da medias e medis ch'ins haja tralascà durant onns da recrutar dapli medias e medis a las universitads svizras. Ina gronda part da las medias u dals medis che cumenzian oz lur carriera professiunala na veglian betg exnum lavurar sco media u sco medi da chasa, causa cundiziuns da lavur detg pretensiusas (pi-

«I dat vischnancas che sustegnan in nov medi p.ex. cun affitar localitads per in pretsch pli favuraivel.»

Marc Tomaschett mainagestiun da l'Uniun grischuna da medias e medis

chet). In proxim motiv per la stgarsezza da medis da chasa è da declerar cun il fatg che passa la mesadad dals medis da chasa en il Grischun èn da la vegliadetgna 55+. I dat perfin 13 medias u medis che fissan atgnamain pensiunads, che lavuran però anc adina. I dat uss stentas per midar la situaziun, tranter auter cun raits da medis che collavuran tar il servetsch da pichet ubain cun vischnancas che porschan cundiziuns attractivas per installar ina pratica da medi. Marc Tomaschett: «I dat vischnancas grischunas che sustegnan in nov medi per exempel cun affitar localitads per in pretsch pli favuraivel.» [Pagina 2](#)

«Eu nu vess mai d'avair temma d'ün nolla a nolla. Sch'el giovess.»

Arnold Rauch sa regorda dal meglier tiragols da tut ils temps – igl era bain in Brasilian, ma betg Pelé! – Pagina 16



FOTO AUGUSTIN BEELE

## In'jamna da fiasta va a fin

Avon in'jamna ha il Cussegl naziunal a Berna elegiu siu president. Ch'igl ei Martin Candinas han ins viu, legiu ed udiu stediamein l'jamna vargada. Sco finiziun dallas festivitads d'elecziun ha la vischnaunca da Sumvitg organisau in beinvegni per «siu Martin». Politica, las uniuns, pign e grond, han lu era rendiu honor ed ein vegnidas a Rabius. Leu ei Martin Candinas carschius si. Ch'el ha mantenu sia attaschunza a vischnaunca e vitg han ins viu e s'encurschiu sonda vargada. (fmr/abc) [Pagina 7](#)



10049



9 771424 749004

Servetsch d'abunents e da distribuziun: tel. 0844 226 226  
mail: abo@somedia.ch



Ena dumang singulara cun cant gregorian digl Rorate ainten la tor cotschna senom igl Pass digl Gelgia.

FOTOS BENJAMIN HOFER

## La gleisch gregoriana segl Gelgia

Dalla notg aint igl de, per mintgign da nous en'ordinariadad. Galdia tranter stgeir e cler cun cant meditativ ò mintgign tg'è sto ad egn digls quatter concerts Rorate digl Origen Festival Cultural ainten la tor digl Gelgia. En evenimaint cantic cun en'ambianza quieta, tгода ed eleganta.

GION NUTEGN STGIER/FMR

Igl è la dumang allas 06.00 ed igl è anc stgiraonta notg. Giond vers igl Pass digl Gelgia togligl a Beiva gist d'ave marcia. Igl tschiel è betg gist cumpletamaintg seragn, l'egna u l'otra steila ins vei tuttegn. Cun eir vers sid sa mossan adegna duple steilas. I savess esser la notg da Nadal, ma igl è igl ampren de digl meis da december, igl meis dalla gleisch, dalla speranza e dallas notgs anc pi lungas. Anc è sur igl pass betg grond traffic, cun excepziun da varsaquants camiuns. Per veia èn er anc treis postas, per la dumang bod bagn ensatge nunusito. Sensom igl pass sa ferman ellas e bleras persungas sortan e constateschan tgi cun minus 15 grads è la temperatura pi freida, criva e malampervla sen 2284 m s.m..

Per betg far cunaschientscha cugl clima pi roc von tots schi spert scu pussebel ainten la tor cotschna. Tschents e tschents candeilas procuran per en bung tgodign, en'atmosfera agreabla, mievla ed ena constataziun tgi mintgign stema fitg. An igl dat tgi tschintg candeilas ardan betg e chel fatg caschungla tgi auditori daveiras en stupeida. Aint igl frataimp ègl las 07.00 e tschintg donnas cun sutanas cotschnas aintran e sa mettan anturn igl altar.

### Targlischour scu las steilas digl tschiel

Igl auditori po betg spitgier tgi las vouchs dallas donnas resungan. Alla fegn finala èn visitaders e visitadras digl Rorate gio siva da vers treis ouras an peis e tots sa legran digl cant gregorian tar l'aurora la dumang.



Cant gregorian amez la tor digl Gelgia – interpreto da tschintg cantadouras dalla Hollanda.

Igl è anc adegna ena calmezza ed ins sainta strousch en pled, angal la ramour dalla sfola tg'è gist passada sur igl pass.

Igl amprens plets èn alloura dalla melodia «Lucernarium», igl ampren toc tgi la gruppa internaziunala «Wishful Singing» ò canto ed ò gist fatg surstar igl public. Durant igl cant ò ena cantadoura anvido las tschintg candeilas digl altar, uschia tgi igl maletg dalla tribuna ò re-

tschet anc duple expressiun, vistgia e cunturn. Chegl tgi suonda alloura canticamaintg dallas tschintg donnas è sto d'anc bler duple targlischour tgi las steilas digl tschiel seragn tg'ins vaseva tras las fanestras dalla tor cotschna. Cant da qualitat dalla classa superioura, a cappella igl pi fegn, chegl acustic. La qualitat individuala da mintga cantadoura è sa mussada scu igl fundamaint per la purezza collectiva, ar-

muneia ed equilibrer. Las dus sopranistas, la mezzosopranista e las dus altistas on betg angal persvas canticamaintg, mabagn er chegl tgi pertotga la preschientscha sen tribuna. Igl plascheir digl cant gregorian interpreto dallas tschintg Hollandesas è sa transfurmo segl auditori. En auditori tg'ò galdia l'antschatta digl davos meis digl onn cun pudeir sa legrar graztga agl cant anc pi fitg segl taimp d'advent. Cun lour talent

musical on *Anne-Christine Wemekamp*, *Maria Goetze*, *Marleen van Os*, *Stella Brügger* e *Marjolein Stots* testiftgia tgi er tschintg donnas son porscher en grond e sonor spectrum scu tschintg omens. Mintgigna dallas 15 melodias è neida interpretada cun exactezza, an moda schi fegna, plagn calour, da bler cor ed er ordafora.

### Spitgia dei cugl applaus

All'antschatta digl grondious Rorate ò *Konstantin Binkin*, el tg'è sto responsabel per la gleisch anc gia da dar cun l'illuminaziun ena cunterpeisa alla stgiraonta notg, dantant pi dei tgi igls «tschintg anghels» on incanto igl auditori e pi paca influenza ò gia la gleisch artificziala. Persiva ò l'aurora dalla dumang procuro per adegna duple cleritad, ambianza e pigl dretg maletg ainten la tor. I vign adegna pi cler e las vouchs magnificas dallas tschintg donnas davaintan anc pi cumpletas, pi radondas e pi coloradas.

Aint igl frataimp ègl de e gist an chel mument cura tgi las tschintg cantadouras cantan per la fegn en «Agnus Dei» vignan las muntognas digl Gelgia andoradas digl amprens radis da suglegl tgi annunztgan igl nov de. Cugl davos tung, cun l'avada da suglegl è igl Rorate a fegn ed igl auditori schi entusiasmo tgi per betg disfar l'ambianza e la calmezza vign dei renunztgia agl applaus. Igl è las 08.30 ed igl thermometer mossa anc adegna minus 15 grads. Schi spert scu pussebel puspe antrar ainten las postas per far igl viadi a tgesa siva d'ena dumang plagn targlischour cantica, tgi lascha sa legrar sen la pi gronda gleisch, chella digl 24 da december.